

## JONES, JOHN HERBERT ('Je Aitsh'; 1860 - 1943), newyddiadurwr ac awdur

**Enw:** John Herbert Jones  
**Ffugenw:** Je Aitsh  
**Dyddiad geni:** 1860  
**Dyddiad marw:** 1943  
**Priod:** Elizabeth Jones (née Parry)  
**Rhiant:** Elizabeth Jones  
**Rhiant:** William Jones  
**Rhyw:** Gwryw  
**Galwedigaeth:** newyddiadurwr ac awdur  
**Maes gweithgaredd:** Llenyddiaeth ac Ysgrifennu; Argraffu a Chyhoeddi  
**Awdur:** Gwilym Peredur Jones

Ganwyd 29 Mai 1860, yn Nhalsarnau, Sir Feirionnydd, mab Elizabeth a William Jones, garddwr ym mhlas Cae'rffynnon, a blaenor yng nghapel M.C. Bethel, a fudasai o Faesneuadd, ger Llanaelhaearn. Yn ysgol y pentref y cafodd ei unig addysg reolaidd. Wedi yspaid yng ngwasanaeth teiliwr ym Mhorthmadog aeth i Birkenhead i ddysgu crefft y cysodydd, ac yn 1882 aeth i Gaernarfon i ddilyn ei alwedigaeth yn swyddfa'r *Herald Cymraeg*. Dychwelodd i lannau Afon Lerpwl yn 1890, i weithio yn swyddfa'r *Cymro*, eiddo Isaac Foulkes, ac yn yr un flwyddyn priododd Elizabeth Parry, o Gaernarfon a chyn hynny o'r Baladeulyn, Nantlle; ganwyd iddynt dri o blant. Etholwyd ef yn flaenor yng nghapel M.C. Parkfield; gwnaeth lawer i ledaenu'r achos a bu'n ddiweddarach yn flaenor yn eglwysi Woodchurch Road a Laird St., Birkenhead. Ystyriai ei ymdrechion yn rhan o'i brif orchwyl sef amddiffyn gwareiddiad a diwylliant Cymreig yn wyneb peryglon y trefydd mawr. Am na allai'n gydwybodol gefnogi Isaac Foulkes ar fater eglwysig a gynhyrfai Lerpwl a'r cylch ar y pryd ymadawodd a'r *Cymro*. Am ychydig amser bu'n cysodi yng Ngwrecsam; ond yr oedd eisoes wedi cychwyn ar ei yrfa lenyddol gydag ysgrifau wythnosol, a ysgrifennai wedi gorffen ei ddiwrnod gwaith, i'r *Genedl*, pan gytunodd â'r diweddar Hugh Evans yn 1906 i gymeryd gofal papur wythnosol y bwriedid ei gyhoeddi - *Y Brython* - a golygodd ef hyd ei ymneilltuad yn 1931. Wedi hynny parhaodd i ddarlithio yn fynych a bu ar daith yn U.D.A. yn 1932. Yn 1941 aeth i fyw, gyda'i ferch a'i gŵr, ym Mhen-y-groes, Sir Gaernarfon, lle y bu farw 23 Mawrth 1943. Cyhoeddodd (1915) destun o *Lyfr y Tri Aderyn* (Morgan Llwyd), ac amryw lyfrau yn cynnwys rhai o'i brif erthyglau ei hun yn *Y Brython*; dyma deitlau ei brif lyfrau - *O'r Mwg i'r Mynydd* (1913), *Swp o Rug* (1920), a *Moelystota* (1932).

### Awdur

**Yr Athro Emeritus Gwilym Peredur Jones**, (1892 - 1975)

### Ffynonellau

Gwybodaeth bersonol

### Dolenni Ychwanegol

Wikidata: [Q20733441](#)

**Dyddiad cyhoeddi:** 1970

**Hawffraint Erthygl:** <http://rightsstatements.org/page/InC-RUU/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n tudalen codi arian am ragor o wybodaeth.



#### Arddull APA



Jones, G. P., (1970). JONES, JOHN HERBERT ('Je Aitsh'; 1860 - 1943), newyddiadurwr ac awdur. *Y Bywgraffiadur Cymreig*. Adferwyd 3 Hyd 2024, o <https://bywgraffiadur.cymru/article/c2-JONE-HER-1860>

LGC  
NLW

LLYFRGEL  
THE NATION



Ysgrifeddiadau  
Llywodraeth Cymru  
Copied by  
Welsh Government